



周益公文集第三十二

省齋文稿卷第三十二

宋廬陵周益公必大著

墓誌銘二

文林郎劉君

今猷墓誌銘 乾道六年秋

紹興辛未春廬陵邵貢士對策集英者西人予與辰
告劉君齒齊而志合相好也既唱第予注徽祿君亦
得尉外邑將同寮焉未幾予易中都官而君丁外艱
或離或合率數歲一見隆興改元予自左掖奉祠歸
君方築室治園圃教侍文吹竹彈絲以娛太夫人予
數過之相得益歡乾道三年君去佐武陵幕予計日

需其歸五年冬乃聞君遭母喪纔狹旬以毀卒予哭
之慟明年春諸孤持道州永明縣主簿彭恪狀來請
銘予方以使闕奏事未暇作也秋八月書來告曰壩
期迫矣幸賜之銘噫尚忍銘吾亡友也夫君諱令猷
辰告字也其先自金陵徙家吉之太和縣曾祖紹不
仕祖及甫贈右宣教郎考諱辨左承議郎通判德慶
府號通明吏其卒也侍讀胡先生為誌其墓毋歐陽
氏君少穎悟年十四別駕公令東流君一試池校輒
魁諸生自是益刻意問學文采日新初別駕年二十五
由鄉舉登科君亦如之歸拜二親里閭嘉歎調婺源尉
不克赴主贛州興國簿吏以例齎銀若干來迓君曰
例可承耶却之或曰如他人何君悟曰簿廨寓僧坊
三十年盡斥賣為土木費乎後遂以成後人賴之邑
令同里劉公子昂健決能治劇得君大喜相與通譜
系君悉心佐之政遂為一_郡最秩滿循左文林郎調常
德府觀察推官一府咨賴他郡有疑事部使者必付
君平決無不中理諸公文薦之湖北控川峽岸洞庭
連辰沅號險阻荒絕_承檄者率規免惟君未嘗辭奔
走殆無寧歲竟以此病然猶自力恐貽親憂會大夫
人卒君病遂劇以十一月十八日亦卒享年四十四

歸葬于廬陵縣連山桐木岡元配易氏祔實六年十

月二十六日也君再娶曹氏 慈聖光獻皇后曾姪

孫易夫人生五男召孫于孫宜孫耆孫吉孫皆力

有父風孫男女各二人君天資孝友心計精密別駕

平生樂施喜客家無餘貲君未冠幹蠱已有聞盡貲

婦財易良田約用而豐施以養父之志父無庶弟諸

妹婚姻無失時者經紀娶媚家使其幼雅有立常產

不墮人皆義之姻黨有獄吏卒方圍捕親屬駭散君

奪身當其門衆帖帖無敢暴家貲以全其急病好義

大率類此嘗考試宜春江陵解進士郭昌明彭大年

商剛中高岑明年皆擢第兩邦稱為知人嗚呼君有

絕人之才宜為世用而賦命止此予既悲而憐之且

自愧昔者不能推賢揚善負朋友之責也故追叙情

好而系之以銘曰

嗟維君 才且良 富術業 耀辭章

如用我 何不藏 劔發礪 折其剛

彼蒼天 命靡常 尚無憾 嗣方昌

左朝請大夫魯公 啓墓誌銘 乾道七年

近世有儒學起家銳意功名之士曰魯公如晦官雖
不大顯于時而姓名籍籍班列中始予自金陵入朝

以婦家有連相好也會元顏亮將渝盟公曰詣丞相
府論天下事纚纚不止諸公雖知其才而不能用常
以是惜之其後予歸廬陵絕不相聞者累年會公弟
季欽奉使江西予問如晦今何如季欽曰吾兄官遊
不遂退居里中無意世事矣暨予還朝則聞公屬疾
未幾季欽遂以其訃來且狀家闕行事使之銘義不
可辭公諱啓如晦字也其先秀州嘉興人徙海鹽之
武原曾祖延厚祖惟辯隱君不仕父壽寧任右奉議
郎贈右通奉大夫生六子力教以學長啓弟崇寧
間終樞密院檢詳諸房文字公少尤刻苦紹興五年
與季欽同登進士第自是魯氏子弟競勸^舉于鄉者
歲增多公初調建康府溧水縣主簿帥葉公夢得材
之舍行注寧縣事百里以治葉公儒先吏師與公論
計事率至夜分其親厚如此俄丁外艱服除為淮西
江東總領所幹辦公事分司池陽邊烽初息軍費冗
濫公檢柅其姦歲省不貲魏公良臣出守一見歡若
平生遂通婚姻用薦者陸左從政即徙淮西茶鹽司
幹辦公事兩淮惟置漕臣刑獄常平茶鹽事悉隸焉
諸司有疑事輒屬公區處無不中理舒州五邑爭承
久不決公為決之改左宣教即充通州州季教授主

管台州崇道觀起為淮西安撫司主管機宜文字師
劉綱鳩民兵十餘萬將校數百聲隱北方公贊助為
多綱卒衆將亂公訓曉撫循一軍帖帖虜焚摧場邊
民克懼公鎮之以靜人為按堵八主管官告院无顏
亮既斃 太上視師江滸詔公從行兼領進奏院
文書填委整暇若平時 上即位選大理丞治獄
明恕為時所稱公三任于淮雅知南北形勢兵將勇
怯至是輪對為 上極言之且請擇大將以重兵
屯形勝地無事則力不分有事以逸待勞此上策也
上深以為然兼戶部右曹郎官民有詣御史府訴昏
田者輒請付公皆得其情 上方樂聞忠言詔侍

從臺諫冬率其屬條具弊事公言風俗未正紀綱未
立賞罰未當語甚切至頃之請治郡池得州隆興二
年虜再窺邊趣公赴鎮淮人日夜南渡公竭力招集
至者如歸軍士有得信箭刻虜書云云者公笑曰此
姦人規搖衆爾不為動闔境晏然先是諸郡調丁杜
防江擾甚虜師退公以便宜散遣朝廷資羨仍照他
郡如之清溪出城南水潦泛溢人病於涉唐會昌中
刺史李景業始築大堤于南續長橋于北揭名通遠
往來便之歲久浸壞公命增築新堤自城屬齊山延

周... 三
袤數里翼以嘉木醜水為三道橋跨其上別揭新名
迄今以為利乾道元年江浙大饑 上焦勞甚遣
使旁午會九華綿山竹生實饑民就食日千數公思
有以寬 上心具以聞而言者指為導諛非本意也
坐罷郡士民懷公惠政爭挽留不置尋復生管崇道
觀起知真州已而歎曰吾志大而命不副歸歟以佚
吾老初公築通隱詩人何卿麒洪翰林邁王端尹十
朋王思冠秬皆賦五言以美之至是改曰遂隱自為
之賦容至輒歌呼飲酒間以琴奕酣適竟日素喜釋
氏書晚自謂有所悟衰樂得喪泊如也七年十一月
六日以疾卒于正寢享年七十有六積官左朝請大
夫致仕娶陸氏封宜人前卒四子可簡左承議郎通
判舒州可適右迪功郎嚴州司戶參軍贈右承奉郎
皆力學工辭章前卒可輔亦蚤世可復右迪功郎廣
德軍廣德縣主簿濟美垂裕庶其在此二女適左奉
議郎樞密院編脩官孫雄飛右儒林郎監行在點檢
膳軍激賞酒庫所糴場魏仲恭孫男九人珏并羽茲
所開弼翼輩文二人適右承奉郎周準右迪功郎蔡
與文曾孫男三人之茂之柔之純文四人明年三月
壬申葬于湖州歸安縣至孝卿僊嶺與宜人同兆公

性樂易事父母友兄弟根于誠處朋友姻戚間皆得其驩心家範範整整子孫率勸飭雍睦尤喜周恤親族鄉黨義之天姓嗜書少老如一所論著要以名家者為師法有文集三十卷漢紀故異十一卷集皇朝要覽一百卷又韋進江淮表裏圖上邊防十二事蓋將效古驗今自見于功名惜乎弗遂也哀而系之以銘曰

人患無志不患無位患不久生功不患不成嗟吾如晦繇卽而守任非不偶踰七望八年孰非壽然而志竟鬱于初功弗究其圖已乎已乎其亦命矣夫

—— 鄉貢進士歐陽耿仲 弁墓誌銘 乾道九年

歐陽氏族望廬陵而家于永和鎮者尤以儒稱吾友耿仲又永和之卓然者也憶予游場屋時耿仲已嘗學于鄉與其仲奕叔弁季彛號里中四傑雋敏辯博衆屬目焉它日過其居翼翼怡怡有古人風予每語人是家且異其後仲叔相繼蚤世耿仲復屢柳於南宮遂卧末疾乾道九年二月壬辰竟不起嗚呼予識君兄弟絕二紀襲襲而弔者三今惟季也巋然當門戶舍之難堪如此寧不歎以悲乎子扶卜以四月癸酉祔耿仲於鎮東金鳳山祖墓之次銘予責也故不

辭耿仲諱弇朝散郎通判澶州繁之曾孫隱君子璟
之孫貢士襄之子少穎悟善屬文袖書謁御史田公
如鼇許以遠器甫冠與計偕益嗜學不倦後進爭從
之徃徃法其言行有所植立不專為科舉計也享年
五十三平生喜著述類成五十卷號鳳山集取陳氏
實生扶能世其業三女適進士曾顛祖吳從義一未
行二孫次蘇季蘇文一人銘曰

德焉無瑕學焉無邪亦既振厥華謂將昌其家而

止於斯吁其素何清遠縣令鄧君洵侯墓誌銘

乾道九年

清遠縣
令是題
另行起

乾道八年冬清遠令鄧君卒葬有日數文閣直孝士
胡公大書官族蓋其墓孤溥復來謁銘予謂得胡公
書不朽矣奚以銘為溥請益堅乃為紀初終於下方
君諱洵侯字元直世為吉州廬陵縣人曾祖注父衍
皆業儒母曾氏生四子而君為季年十五繇縣庠升
泮宮試藝日有聞預宣和上舍貢靖康改元同其兄
洵美邦彥涇舟與計偕而涇舟遂中第里人稱焉君
既篤學且練習世故樂善喜為人監司守令爭延教
子弟家永和鎮有宅一區負郭田二頃伏臘賓祭有
以自足筆耕文績力也然每上春官輒不利嘗再對

策集英殿下再納勅牒而歸。今天子即位特補將
仕即而君病矣吳吳芮公燁賢者也漕嶺表辟君廣
州清遠令瓊帥復負君為屬皆不果行卒年七十六
易箒猶題詩示子孫初君以十月十九日昧明生其
死也月日時適同衆頗異之娶鄉人歐陽元老女有
鬻行年六十九前君五年卒葬青石之長岡一男溥
也孝而勤於學四女嫁進士丘大章曾尚文餘天孫
男三人良臣忠臣正臣文三人葬用九年十二月辛
酉其地在縣之膏澤鄉灘頭平相嶺君所自卜也銘曰
試言于廷 不瀆于成 覃慶天飛 痰室其

何志之闕 而命之屯 尚崇其墳 燾後之人

叔外祖奉議郎王公竟墓志銘淳熙二年

公姓王氏其先永寧軍博野人世業儒曾祖亮中天
聖進士第以能守邊易武階至洛苑使贈右武衛將
軍祖察少辭任子思不就韓忠獻王宣撫陝西薦其
材而官之終太子左清道率府副率贈屯衛物軍改
中散大夫葬相州之安陽子孫遂為安陽人中散長
子諱復屢典名郡終供備庫使封文水縣男贈少師
次諱後終朝奉郎贈朝散大夫娶杜氏實生公公字
天民宣和五年以父任為將仕郎紹興初補迪功郎

昭州司理叅軍以親老不赴六年主洪州南昌簿秩滿丐監西京中嶽廟以便侍養陞右從政即調福州閩清令所斷精審吏無敢欺洪水暴至公禱南山水即退闔境神之去為豐城縣縣當川陸要衝素號難治令鮮終更者公至則大治會齊述嬰贛城叛王師出征公未嘗秋毫賦民而過者畢給部使者行邑其徒隸以供張去吏請責償守驛者公獨具名物檄取之郡卒持符至怒餉謝不如欲梓吏喧庭下公杖而繫之積二事臺府外稱其正而心弗善也人往往為公曰不過不吾薦耳焉能害我終亦無他徙吉州太和令太和尤號難治又乘舊政廢弛公剷除蠹弊束縛奸宄聲譽赫然盜自他邑來尉不能拒吏民驚避公自率衆擒之財數月丁內艱而去時二十五年也服除調衡州安仁令三十一年論太和功改右宣義郎知江州瑞昌縣轉右宣教郎仆姦植良人服其能轉右通直郎賜緋衣銀魚乾道七年通判郴州轉右奉議郎九年主管台州崇道觀淳熙二年六月卒於正寢享年六十有七取宗室女先公二十二年卒贈孺人四男簡籌錢篆二女俱未行孫男二人泚澄女二人公天資明敏尤長於吏事使遇盤根錯節攄發

游刃必將振耀一世取富貴如拾地芥而淹屈州縣
汨汨以老其命也夫初公葬太宜人於撫州臨川縣
靈臺鄉烏龜源遂家臨川遺命卜葬於茱側諸子乃
以是歲八月二十四日襄事使來取銘公於先夫人
為從叔凱風寒泉之恩其何忍辭銘曰

維吏之能以公售私用力雖勞人孰汝宜
公才敏明而守堅正寧身之誦不撓其政
周旋五邑民允懷之纔佐一州奄其殆而
天賦其能不畀以命嗚呼柰何尚篤餘慶

承務郎胡君

涑

墓誌銘

淳熙三年

君諱涑字季永吉州廬陵人曾祖愷妣張氏以百歲
封孺人祖載贈朝議大夫妣碩人陳氏張氏父澹庵
先生銓以勁節危言為國司直雖小夫賤隸推髻弁
服無不知其姓名今為龍圖閣學士妣碩人劉氏紹
興八年先生自樞掾黜佐福州幕道由姑蘇而君生
故小字蘇郎六歲隨先生謫新州已能背誦春秋詩
人陳元忠試之流目為春秋生先生再貶朱_崖渡海
道瓊故參知政事李公光在焉見君頴悟許妻以孫
自瓊過澹耳拜蘇文忠遺像於動鏡閣喟然歎年
方一星終人皆異之既抵_崖先生聚徒授業諸生

動鏡閣

先字

耶字

人執一經求訓解君甫弱冠往往與討論二十六年
秦丞相死先生與李公皆內徙初秦氏揭二公及趙
丞相姓名於格天閣趙丞相前薨至是先生賦詩有
閣下大書三姓在海南惟見兩公还之句君口不絕
嗟先生曰孺子可教因授以句法三十一年春侍先
生歸廬陵講道家塾兄弟怡怡如也 今上登極
先生自吏部郎不逾時以左史入詞掖遂為兵部侍
郎君日從中朝名士游聞見浸博隆興初郊奏補右
承務郎家居累年或勉以仕則曰吾斯之未能信乾
道七年先生固命君類試中之虞丞相邀與相見略
不干以私調監淮西江東總領所太平惠民局兼監
行宮雜買場先是先生得旨進所解易春秋及二禮
君日夜編次讎校先生賴之淳熙元年春君當之官
而不忍去親先生曰吾固欲泛大江游金陵其亟具
舟吾與爾俱君乃迎侍以行番守公珙以二府重望
少許可獨禮君厚薦之公車二年秋得寒疾逾月病
益侵呻吟皆詩間作樂府詞旨超詣十一月庚午竟
不起得年纔三十八配即李氏其父孟堅終淮東提
舉茶鹽生三子槻榘程又有遺腹君人物爽邁天資
孝友幼君母喪如禮事所生母袁氏尽敬學有家法

掌讀橫渠易至心化在熟繫節歎曰至言也請終身
誦之雅好吟詠慕陳後山而學焉某蒙先生不鄙間
許唱酬君輒用韻見詒語皆驚人蓋天才有過人者
充其素蘊必將發聞於世一病舍而遊可哀也已弟
泮泮瀉及其孤奉先生之命卜以三年夏四月壬辰葬
君吉水縣中鵠鄉白連塘之原使以妹婿葉昌嗣之
狀未請銘某按禮記延陵季子適齊而長子死葬於
贏博之間既葬而封既封三號遂行孔子曰季子吳
習禮者也蓋言其在吳為習禮耳既而曰季子之於
禮其合矣乎是又疑之之辭也周禮以長子為門子

謂將代父當門者也其事重矣昔就其養於所居之
官今返其柩於父母之邦若先生者可謂知禮矣

木生荆山 既厚其培 雨露濡之 庶幾條枚
飄風振林 秀者先折 天乎柰何 尚茂耒葉

朝散大夫直顯謨閣黃公墓誌銘

石墓誌銘 淳熙四年

公諱石字地老姓黃氏世為温州平陽人曾祖遂祖
暉父理有聲太學贈官至朝奉郎母陳氏贈宜人公
幼篤孝及長識慮精審喜論國家大利害紹興七年
投匭上書言內事可治者七外事可治者四 天子
異之下其書給舍皆謂切時可行詔永免文解加賜

東帛明年遂中進士第補左迪功郎融州觀察判官未赴改福州州學教授學規素弛公命正錄而下各舉其職諸生或不告輒出公曰此職事不職也尺罷之聞李葵李楠林之奇為衆推服即走其家備禮延致學祖故為吏乾沒供饋日朘公大加括責歲輸數倍於是增置弟子負優給事職以俸而督其藝業帥左承葉公夢得賢之薦于朝葉公尋奉祠闔郡郊餞獨顧公曰子且顯其自愛袖出前執政薦章畀公其見器如此秩滿以書抵秦丞相上踐祚十九年儲貳未立安危所繫熟大於此公獨不開陳乎不報得西外敷宗院宗學教授視事踰時丁內艱二十二年免喪秦丞相尚當國公申論前事秦曰君謂某向不省恥面舉百餘言而以特未可為解復得南外宗學教授丁父憂不赴服闋沈丞相秉政公以語秦者語沈沈亦不能用授建康府二學教授而去二十九年留守張忠定公召赴闕公送以書大略言內則國本未定闕寺寢昵外則北虜懷貳大將乏人國用不給張公咨羨既入對言儲貳尤力適契上意未幾遂行典禮三十一年冬元顏亮死議者爭欲乘機進取會太上皇帝視師金陵公獨陳八事謂宜按甲休兵徐

侯虜變其後諸將果然無功駕還臨安公以銓格改
宣教郎選充諸王宮大小學教授 主上登極轉奉
議郎賜服緋銀乾道元年九月輪對論二事其一曰
舜大治而禹蓋儆戒先虞成王守成而周公作無逸
真宗東封還孫籍上書勸無自滿假召試賜出身今
南北始和願 陛下以舜禹成王 真宗為心蓋
自戒懼無或暇逸 上獎諭云卿言真致治之本其
二曰儲君學問當求堯舜禹湯文武之用心不當如
書生分析章句締繪文辭時莊文太子畱意於詩公
故及之 上大喜曰朕固嘗以此論太子卿言正與
朕合退朝以章送東宮且批付中書黃某與陸擢差
遣今晚便可擬進遂除校書郎入館不試蓋異恩也
十一月進著作佐郎二年省試初擬公點檢試卷上
特陸參詳官三月再對力陳正心出治之要 上曰
卿言不謫旦夕別有委用四月兼權司封郎官十月
為真仍兼司勳十一月 太上聖政書成以公經修
進秩一等四年夏三輪對力言陛下為治雖勤而未
得其要且用人當辨才與德其語益剴切十月除樞
密院檢詳諸房文字十一月改右司員外郎廷尉讞
囚有父被歐不死而其子託以復讎殺歐者二人朝

議貸死公言父未嘗死而置殺人之罪他日頑民與人
有仇尊父使鬪從而殺之將不可禁如死者何詔
是公議五年八月進左司時公與左相善右相不樂
也會蜀人蘇森乞用元祐黨籍思補官右相欲與之
公言紹興六年雖許補官尋以偽冒故八年纔令免
解既充前勅矣右相滋不悅公遂引去除直頭謨閣
江東轉運副使六年行部值諸郡大水壞大平圩田
公以其事申三省而重於再出擾人亟委官相視振
濟且奏其施設之序三省得初報即取旨差公躬親
按視畝方下而委官之奏適至時左相已去右相刻
公弛慢不親行降兩官罷疎勸之辦公曰吾失職獲
譴尚何辨聞者韙之六年冬主管台州崇道觀繼復
元官九年八月再任崇道觀淳熙二年十二月六日
以疾卒享年六十六積官朝散大夫妻宜人王氏某
人之女男裳迪功郎新衢州常山尉三女長適林俱
次適迪功郎湖州武康縣主簿毛密季適迪功郎新
臨安府司戶參軍林達己孫男女各一人其子卜以
四年十一月壬申葬公墓鄉某里貸山之原使來請
銘某昔與公分教金陵雅相善故知公為詳銘曰
一金華唐與政名仕也知人而善評嘗謂圯老容粹

而溫心和而平稠人廣坐語如不出諸口間發一言
則辭尽而理明蓋靜而能謀柔而不傾學耻虛文而
實用之為貴論不阿世而君民之為心若此者可以
為天子之近臣矣嗚呼是為銘

省齋文稿卷第三十二

周益公文集第三十三

省齋文稿卷第三十三

宋廬陵周益公必大著

墓誌銘三

靖州太守李君

發

墓誌銘

淳熙五年

公諱發字秀實吉州吉水縣人曾祖宗應宗復父汝明
贈朝散大夫母冝人彭氏初五世祖葬縣之赤石潭
卜云子孫百年當有為二千石者大夫一日夢至潭
上見巨鯉躍出驚波洶湧震動磯石傍有偉衣冠人
笑曰發矣發矣未幾生公因以為名大夫既力學不
遇刻意教三子長卓季植公其仲也幼警悟能文十

四入郡庠遂貢京師兵興徒步還家已而重臣分鎮諸道客從者取祿仕如拾芥公遊襄漢夔峽間數以奇策撼將師獨落落無所舍乃復事科舉年未四十用太學連舉息收赴集英試補右迪功郎鼎州司理參軍時紹興五年也公素號通明加以精審比三年因無瘦死部使者言狀特循修職郎去攝邑黃陂調永州零陵令民稅久不均田在左鄉率籍于右又皆寄產傍邑謂之僑戶豪民猾吏相表裏賦役病焉令佐課常殿公始至命設幕兩廡下人未喻公意明日召稅戶若有所訓曉者既畢集則分寘諸幕使人人自列產幾何稅安在不實聽相糾將根株逋負痛繩以法實則貫汝又圍群胥於獄命吐其實而參考焉民與吏倉惶失措懼不相應無敢隱者即日正田三萬伍千餘畝爭訟既絕歲入大增課為一道最秩滿陸右從政郎移郴州永興令境接溪洞民強梗難治公息威並施罔不畏服諸司以京秩薦者章二十上改右宣教郎知贛州興國縣丁太夫人憂免喪判通橫州攝守于賓二十六年詔監司守臣條具便民事公奏交廣俗誘民男女易翠羽蠻中初猶一夫直十二羽今僅得其半歲掠賣數百人多烹以祭鬼乞重

其禁 太上皇帝惻然從之尋命焚翠羽於行都自
是鬻人者息矣轉通直郎二十八年改知貴州以疾
求主管台州崇道觀轉奉議郎明年為奉使金國書
狀官進秩一等三十年擢知沅州轉朝奉郎 今上
登極改靖州轉朝散郎沅靖介獠夷控御稍不至鴟
張虬結為害一方公撫以誠信興崇學校使荒遠悍
戾之習浸淫教化感帖帖無事既合符吏上公履歷
于銓部誤書年甲考功以聞有詔貶秩遂致其仕公
怡然不以介意日與親舊樂飲絲竹歌呼窮晝夜不
倦如是者累年年八十有一強健若五十人與其兄
黃髮相對怡怡如也季早世則教育遺孤使有立鄉
人服其友愛淳熙改元燈夕會客如平時已而微感
疾癸丑遂卒三年十月丁酉葬于本縣仁壽鄉南岡
之原初娶潘氏鄂州太守唐之女再娶張氏戶部侍
郎運之甥皆贈安人又娶莫女亦先公卒六子千里
千秋千頃千得千言俱天弟子三乘今為迪功公即
新筠州司法參軍能世其家一女適右朝奉郎知邕
州葛永慶再適奉議郎前知南安軍南康縣彭邦光
有孫曰蟠女二人初公與今龍圖閣學士澹庵胡公
同肄業鄉校其休致也胡公入佐冬官適奉詔薦士

郎上疏曰李某文采議論皆過人尤長於吏事三為
邑五典郡然皆避_避方僻地未究其才上官數交薦今
雖老尚可治劇未報有諫官者乃以是咎胡公胡公
坐去國猶念公不置移書責當路云諸公皇皇市駿
骨而使老驥伏櫪耶嗚呼士大夫視時向背不肯犯
嚴出_存口聞胡公勇為義篤於舊而不以進退貳其
心寧不愧哉他日乘以其從兄靖州教授誦之狀遠
來求銘予謂胡公知公如此乃近捨皇甫何也乘曰
得胡公銘我先之人名固可不腐將如胡公之德不
著何屬之子則併著矣某曰然為之銘曰

謂公弗遇耶則仕盈萬石矣謂公弗壽也則年開
九帙矣而縉紳鄉閭猶未免乎_哀窮悼屈者以祿
雖豐未究其用_盡雖宿猶裕於力也雖然自古才
能之仕固有阨窮不霑一命短折冠于六極者矣
公何戚哉公何戚哉

靖州推官張君_{庭傑}墓誌銘_{淳熙五年}

公諱庭傑字漢卿姓張氏吳郡人曾祖政祖_夔父憲
錢塘尉母余氏累世同居鄉里義之漢卿少業儒未
冠而孤事叔父烏程尉士能任其家政勤勞弗懈歲
時親賓會集漢卿必冠帶侍側翼翼如也烏程既沒

漢卿薄貲產均畀其子姪無毫髮私人皆咨羨起家
迪功郎靖州軍事推官非所好也卜居城中之花橋
用所以事烏程者齊其家內外整整群從多饒於財
漢卿獨刻意教子藏書數千卷士大夫喜從之游漢
卿亦好客不倦也州西三十里有華山山復有大池圖
經云嘗產千葉白蓮漢卿鬻得之日課僮僕刈剔巖
竇疏導泉流創亭榭十餘區還以佳花美木四時皆
有竒觀戶部尚書孫公覲為之記遂為吳門絕景漢
卿既葬其婦山中又自為冢舍日往游焉生事皆置
不問人多笑其迂然漢卿心計自有餘雖不作潤屋
計而伏臘猶給無求於人既老預治棺槨衣衾曰吾
宗鮮登中壽家則過之瞑目無憾矣淳熙三年五月
疾革精爽不亂惟以和順力學勉子孫甲子遂卒享
六十有六娶李氏在朝請大夫通判廣德軍寬之女
先十七年卒五子長聖任早預鄉薦繼入太學為學
論次聖清皆前死今日謙曰順曰復謙亦大學生謹
愿有父風五女長適承議郎簽書南康郡判官廳公
事蔡瑀次適文林郎新知揚州江都縣李安上早世
次適朝請郎新知南恩州楊挺二尚幼孫男五人錫
錡銓鏞鏜文二人謙等以明年十二月壬午葬公華

山實與李夫人同穴蓋吳縣長洲鄉也昔外舅浙東
提點刑獄王公葆先娶公姊兩家情好久而益洽予
以是與漢鄉往來三十年乾道壬辰予自小宗伯奉
祠過平江徧游城西諸山漢鄉時再酒邀予自靈巖
入天平遂登華山訪古道舊為笑樂最後置錢虎丘
酒闌悵然曰某老矣再見恐無期它日尚誌吾墓予
曰公尚強健何遽及此後三年予還朝復與漢鄉通
問無虛月又一年而漢鄉卒其子以監察御史潘公
緯所書行實來求銘予其忍辭銘曰

人生斯世孰能無求 晉楚之富 金張之侯
無以收之 其樂也憂 表表張公 不膠不流
治生求官 與俗沉浮 佗人營營 已常休休
有琴有書 賓燕綢繆 有子有孫 絃誦優游
生無欣戚 死何怨尤 華山之原 樂哉斯丘
勒銘純之 名與山留

秘閣脩撰湖南轉運副使蕭公敏墓誌銘

淳熙五年

公諱之敏字敏中系出梁蕭氏五世祖自豫章徙居
江州之湖口曾祖昇妣譚氏祖仲山妣徐氏考固業
儒而不求仕惟孜孜教子後贈朝奉郎母安人彭氏
公少好學有濟時之志李成剽九江係累齊民如買

魚公亦被掠以書生獨免繫會夜賊醉寐公密拔其
刀斷民縛縱遣然後遁去時猶未冠人皆竒之登紹
興十二年進士第補左迪功郎蘄州廣濟縣尉未赴
辟襄陽府司法參軍府捕強盜陳大漢等十三人不獲
鄉民群行適符其數廵尉執送官不堪答掠皆誣狀
公約法疑之白帥移獄已而楚州獲真盜闔府嗟異
戶部尚書張澄吏事精明禮部侍郎陳桷號醇正相
繼來守屬吏奉承不暇惟公遇事爭辨不屈桷常曰
司法突兀長身他日真御史也自是有蕭御史之名
二十年用薦者陞從事郎知歸州梯歸縣產縣椒漆
蜜臘部使者科買無藝公一切拒之境有龍湫洞歲
旱群禱雨不應公禱輒應民號知縣兩循文林郎調
建康府觀察推官舒州惡少張天錫父子五人夜投
宿僧寺僧不納敢天錫踰垣殺僧爨鞠不承遷延數
年株連者多死詔江東選官鞠治公至天錫即伏辜
武臣梁俊彥獻議增沙田蘆場稅詔同金部員外郎
莫濛視^律勢燄張甚至叱責轉運使公不為動稅以
不增金陵大府貴游子弟多在焉又常守以大僚郡
事綱舉而已幕職曹掾官日夜縱飲歌呼往往踰越
法度諸司略不孰^誰何公獨介然居中時箴切之受納

秋苗例別給餐錢公謝不受守固謂公毋妨他人公
盡以修官解戶部尚書韓仲通以法律進其居守也
御僚吏嚴甚無敢可否事民有刃傷盜桑者盜投繯
死吏當其主故殺獄已具公抗執不書仲通初大怒
已乃薦公改秩時公在選調踰二十年未嘗求之於
人將代學猶關府僚數十人列誦其賢於畱守樞密
王公綸王公為成之改左宣教郎知興國軍大治縣
三十一年元顏亮渝盟上司籍民為兵日役數千人
冒雪植暗椿鹿角寨為防江計公度不足時徒困民
力亟請散遣上司不能奪明年兵解以疾去官隆興
改元復知建寧府建陽縣邑大難治自政和以來閱
五十餘令終更者纔七人公至務以禮義化其俗民
翕然順從至繪像刻文紀公善政乾道元年轉奉議
郎未幾賜^舉五品服三年選為幹辦行在諸軍審計司
未上有詔學^舉御史大臣以公名聞五年四月召對
便殿論正風俗上曰正風俗當何先公曰仁祖時
朝臣以危言謹論為忠偷合苟容為耻故風俗醇正
崇寧大觀而後及是在陛下示之好惡耳上曰誠
如卿言朋明日除監察御史六年轉承議郎七年六
月轉對言人心之於國猶身之元氣今欲復土疆其

本在結人心警之良醫治病必先護養元氣乃可攻疾此非書生空言孫吳論兵亦出於此 上曰所謂一曰道而孟子亦云不嗜殺人者能一之又乞減冗費省冗兵 上皆嘉納八年正月秀州華亭捍海堰成命公按視公還奏縣之四鄉鹹水壞田乞蠲賦稅三年 上從之三月臺諫官皆坐論執政奉祠去 上以公分察歲久見謂直諒擢拜殿中侍御史公感激恩報為 上言治亂安危由言路通塞願備其官假以事權毋使風采消沮又言前歲浙西夏澇秋旱江湖淮南歲北不登民多流離今正陽之月天多沉陰寒氣慘慄是謂常寒側身脩行茲其其時矣繳進富文忠公熙寧初奏議 上曰富弼所論誠實有愛君憂國之心公知 上聽納即疏言漢災異彙免三公今宰相名任恢復實為持祿保位計變理乖方既不引咎聞人言災異輒肆怒罵 陛下昨許六察言事今乃令求實迹專務蔽闕聰明故二三年來莫敢言其失併條奏擅權不公等事 上曰卿所論甚當可謂稱職於是宰相上章請去搢紳喜曰鳳鳴朝陽矣會宰相復畱乃除公直祕閣提點江東刑獄制司有剛方不撓質直而明造膝之辭有犯無隱正人去國

豈朕所欲之語蓋在職纔四旬所論如此直聲遂聞
於天下既至江左郡守多要官公舉刺各一人上
皆罷行之所部肅然淳熙元年轉朝奉郎君為太府
少卿公奏臣奉使無補可以復召上曰思卿直諫
耳公奏提刑並置文武非是互用一員足矣又論經
總制錢及額則賞是誘其求增羨也請罷之又奏諸
路水旱頻仍今歲僅得中熟而七月錢塘風潮壞隄
岸居民死者數千人災異在遠尚不可忍况都門之外
乎又九月壬子距立光數日雷晝夜發聲亦非休
證惟益脩德政轉福上曰卿直諫之氣殊不

衰未浹日兼權禮部侍郎進司農卿明年三月遷國
子祭酒太學之士以得明師交相賀先是職事闕請
託紛然公籍校定優劣升補先後為之格遇闕則察
行藝次第而授奔競頓絕舊制職事官例牒宗族補
試是歲公自以長官臨泣令二子毋得入其後學官
子弟中國子生者皆駭放始服公之先見頃之諫官
論職名不當輕授公適引疾去八月以本官提點
浙西刑獄陞辭奏曰周公作無逸大槩言畏天恤
民和衆勤邦儉家省躬罪已有容德具此八善自然
保壽無疆今會慶節不遠臣當需次阻奉萬年之觴

豈朕所欲之語蓋在職纔四旬所論如此直聲遂聞於天下既至江左郡守多要官公舉刺各一人上皆罷行之所部肅然淳熙元年轉朝奉郎君為太府少卿公奏臣奉使無補可以復召上曰思卿直諫耳公奏提刑並置文武非是互用一員足矣又論經總制錢及額則賞是誘其求增羨也請罷之又奏諸路水旱頻仍今歲僅得中熟而七月錢塘風潮壞隄岸居民死者數千人災異在遠尚不可忽况都門之外乎又九月壬子距立冬纔數日雷晝夜發聲亦非休證微惟益脩德政轉禍為福上曰卿直諫之氣殊不

竊未浹日無權禮部侍郎進司農卿明年三月遷國子祭酒太學之士以得明師交相賀先是職事闕請託紛然公籍校定優劣升補先後為之格遇闕則察行藝次第而授奔競頓絕舊制職事官例牒宗族補試是歲公自以長官臨涖令二子毋得入其後學官子弟中國子生者皆駁放始服公之先見頃之諫官論職名不當輕授公適引疾去八月以本官提點浙西刑獄 陛辭奏曰周公作無逸大槩言畏天恤民和衆勤邦儉家省躬罪已有容德具此八善自然保壽無疆今會慶節不遠臣當需次阻奉萬年之觴

願以此言為獻又乞禁止外路獻羨餘又錄蘇文忠公治道篇以進曰陛下既常置軼文坐隅更願熟復此篇以發聖學上皆稱羨相與論無逸蘇文數百言二年改除湖南轉運副使道州江華縣稅重民瘠大軍錢緡上供米八百餘斛力不能辦公奏免之四年上以公舊掌帶職超進祕閣脩撰官吏畏公之正爭檢身恤下湖湘民陰受其賜不可計公方厲志澄清欲徧行郡而病日侵上書丐祠得主管建寧府武夷山冲佑觀勅牒未至以八月丙戌卒於官舍享年六十六卧聞致仕恩外特用前郊恩又官其一子蓋蓋數也士大夫識與不識皆太息鄉人至出涕相弔六年正月壬午葬于彭澤鄉加堰里小桂山之原娶同郡項氏天裕之女封安人生三子長曰隸前卒顓頊皆能世其家顓復以官遜其兄之子四女長適迪功郎筠州司戶參軍李景範次適進士張元觀次以疾居家次適鄉貢進士曹彥約孫男四人必誠必簡必聞必蕃文三人曾孫男一人公剛塞疆義自其天性處心積慮公而不私平居聞時政之善若賢才進用輒懽忻贊美不啻如已有得志遇姦邪欺誕之人直欲折其頭角身之去就禍福弗計也所至

以廉介稱一毫不取諸人其自奉有布衣所難能者
當官毅然初若寡合及與人交表裏彈盡終始如一
遇觸諫從容時溫乎可親也素無嗜好惟聚書至數
千卷讀之不倦每見歷代及本朝名卿奏議剴切平
正者輒三復慨歎耻躬不逮尤慕司馬文正公之誠實
蘇文忠公之議論二書手不停披暗誦率數百言樂
為晚進道之其後正色立朝不為不瀆淵源蓋有所
自紹興末都民望為右正言公移書云司馬公倅并
州猶上儲議且以告諫官范蜀公今足下實任言責
事有急於此者乎民望欲薦公會卒侍御史周樞又
欲援公入臺復以它遷不果晚受 上知自謂可行
所學不忍用細故塞責彈擊自宰相始 上深察其
忠顧勢不兩立姑聽外補未幾竟意相召公歲中數
遷而公病不能留旋齋志以沒豈非命歟初公仕不
建親故於同產尤極友愛常分俸給二婢力教弟之
美後亦登進士弟今為奉議郎知蘄水縣公雅留意
於易博問精思所得深遠暇日喜賦詩未第時都昌
宰郭彥參尉李彞頗工詞章與公相琢磨詩名遂著
公沒二子既衰遺文為三十卷復以蘄水君所狀遺
事不遠千里謁銘於予予昔分教金陵實與公同僚

方他人遊戲相追逐公必過予清談終日於今蓋二
十年中間雖同朝者再而無前日之款矣聞公云亡
殄瘁是悲豈得念舊而已哉銘曰

維昔陽城 安貧篤學 振迹言路 鳳鳴鄂鄂
乃官成均 士化端慤 乃刺道州 聲隱衡嶽
天生斯人 艱以難數 侃侃蕭公 文敏而樸
或塞或通 守道彌確 皦兮真清 蛻于衆濁
以配前脩 誰謂其邈 銘藏諸幽 亦詔後覺

一 朝請大夫致仕賜紫金魚袋黃公 子游 墓誌

銘 淳熙伍年

公諱子游字叔言系出補城黃氏號閩中著姓五世
祖元吉事江南李氏有詩名生全州司理參軍觀登
大中祥符元年甲科司理生太常博士孝先楊文公
之甥尤深於詩蘇文忠公所為一唱三歎者也亦以
進士入官所至輒平反疑獄卒官博州貧不能歸卜
葬陳之宛丘尚書左丞蒲公宗孟誌其墓子孫遂家
宛丘後贈銀青光祿大夫於公為曾大父妣建安郡
夫人章氏銀青光祿生朝散郎知穎州贈通議大夫好謙
與二蘇同登科通婚姻蘇公謂孝友如閔曾者娶陳
氏章氏皆贈碩人穎州生承事郎宰崇寧星變應詔

上封事極論左右蒙蔽宰相蔡京切齒劾以誣罔不
道逮付御史獄長流海島紹興初特贈直祕閣累贈
右金紫光祿大夫即公之父也母大寧郡夫人章氏
公積厚源遠鍾美聚粹以慈祥之性濟明敏之資少
從伯父待制寔蔭為假承務郎金紫之就逮也兄弟
訟寃于朝乞納告身贖罪權臣滋怒公號訴益力父
得不死由是知名大觀三年入宝恩循登仕郎調相
州議曹郡僚負官錢六百萬守委公拘係公哀其窮
縱之使逸守義之為蠲其逋建炎初客南京歐陽徹
以上書忤宰相棄市公適同邸收而葬之其子飛英
年十四公傾囊輟所乘馬其歸棣州軍亂殘通判邵
某家而誣以謀反邵子在鄉懼有後命公為白其寃
於本道轉運使竟官其三子未幾版授潁州汝陰令
時軍須繁拏雖許預借夏歲而稅迫暮不能辦縣帑
貯和買錢數萬緡公欲發之郡守不可公乃召民諭
之曰某戶當受錢買絹若干今計汝所輸夏稅番錢
而給鈔汝歸徐以絹來公私大以為便守下其法於
諸邑四年避地歸閩道由嚴州之朱村土豪守險者
臨公以兵老幼駭竄盡掠其貲事定太守柳約將以
軍法窮治公力止之朱村人繪象以報紹興元年入

監左藏西庫

車駕自紹興移蹕臨安公請銜命

先渡江經度臺省倉庫所寓畫圖以進後皆不易權
度支郎官丞相呂忠穆公都督諸軍權公江東轉運
判官兼隨軍轉運以勞陞副使進秩一等公諉功同
僚俞侯侯亦進秩人多其遜會安撫使與公有憾密
奏公之與罪且不測參知政事沈公與求曰渠有方
被賞遽曠職者且軍前無奏而他司僂言必讒也已
而果然猶坐奪一官會江西新羅劇盜朝廷知公仁
恕選提點本路刑獄未赴改知台州徙池州台產鹽
池產茶姦賍囊橐其中重法不能禁公治以輕典人
不忍犯在池二年獄無重囚屬縣曰青陽偽唐以為
宋齊丘食邑後因田租立稅額其重十倍公代還奏
曰國家涵養斯民二百年矣忍使青陽獨用李氏弊
法乎詔裁其半民為立祠奉事至今久之求浙東安
撫司參謀官以歸自是主管台州崇道觀者伍任遂
致其仕積官右朝請大夫賜服金紫以乾道三年十月
三十日卒于正寢享年八十有八娶武氏左正議大
夫珣之女先公三十年初卒公卜壽藏於鄞縣豐樂
鄉金鵝山是歲十月九日與武氏合葬焉三子仁傑
右文郎林監臨安府軍資庫仁檢文林郎新慶州青

周文公集 卷之三十三 三十一
田丞仁脩從政郎南康軍錄事參軍孫男七人直與
終迪功郎直清將士郎直己直益直行直愛直正文
二人長嫁進士吳鐸之次許嫁進士陳經曾孫男女
各八人公家傳孝友勇於義而安於仁處事未嘗動
聲色而曲折中理所居官咸可稱道靖康之亂挈內
外族姻數百指展轉兵間以身任其寒饑晚卜居明
州奉化縣築聽兩堂橋隱齋兄弟四人華顛相從歲
時燕樂孫曾滿前百頃具備官簿當選置而不言遇
大禮捨其孫而官猶子又竭貲以嫁兄之諸孫閨門
雍睦和氣可掬下至奴隸亦得其惟心尤善與人交
親踈一接以禮士大夫職與不職皆稱公為長者丞
相張忠獻公每對客誦言調歐陽事以謂今無此人
矣公感知已歲遣介問忠獻公於選謫中其忠厚大
率類此公既沒十一年三子惟仁儉在屢以承議郎
王度之狀來請銘惟某族姑歸公兄之子仁術蓋依
公以君者故不待識公而知其行義詳矣振宣出光
宜無愧辭銘曰

浦城之黃 世有君子 公承以仁 允謂濟美
祿雖不多 而壽則遐 嗟爾後人 益保厥家

省齋文稿卷第三十三

周益公文集第三十四

省齋文稿卷第三十四

宋廬陵周益公必大著

墓誌銘四

直敷文閣致仕魯公

嘗

墓誌銘

淳熙伍年

紹興初魯如晦季欽兄弟問學詞章一時競爽名卿
毗陵張公守胡公世將爭為延譽或比之二陸已而
同奏名禮部別院既仕各以議論才術自見為郎為
卿為郡守監司職業交舉 天子器之年至先後樹
其冠里居康寧頽八十乃終洪範五福蓋庶幾焉乾
道中如晦歿沒季欽屬予銘其歲季欽之葬也二子復

以為請何可辭公名嘗字季欽世為婺州嘉興人徙海鹽之武原曾祖延厚祖惟辯父贈正議大夫壽寧妣碩人劉氏公起家左迪功郎臨安府餘杭縣主簿以正議年高求監潭州南嶽廟未幾遂丁憂免喪為廣德軍教授陞從政郎時宰有雅故公不深求僅得台州教授用薦者改宣教郎知衢州江山縣^{詳有}訟數十年不決者公曉以義理多感泣愧謝縣舊科糴本乾薑羊錢歲二萬緡二十六年有詔蠲免而州家用不足別取之民公經畫權酌以其贏代橫歛公私便之守言諸朝下其法它邑遷奉議郎太宗正司主管財用分治於越三十一年明堂赦恩賜五品服

上登極繼如晦主管官告院請^覈空名告身在諸軍者冒濫頓革擢國子監承^奉未上改太常丞隆興二年冬召對論人主當法堯舜及言文武未盡其用百司不守法度天語稱獎拜監察御史公以左相陳文恭公參政錢公端禮姻舊固辭上謂二公曰嘗朕親擢何辭二公言典故不可違故用嘗豈無它官乃改吏部員外郎是歲浙東西水災民大饑疫詔郡邑賑濟選郎官察之公使浙西所過發倉廩人人被實惠具施行次第歸報又陳荒政六事上

甚嘉納特遷一官掌攝右史侍立上顧左右稱其儀
矩凝重且有端人之目俄進太府少卿輪對及治道
機要 上曰卿老成今處司府凡事宜盡誠退即條
奏文書抵牾事 上諭宰相如魯嘗留意職事何
患不治蕪權大理少卿公益感激舊勵遇事可言不
以非其責弗言如論海道備禦蕃舶事宜緡錢會子
輕重相權催科綱運致弊不以咸得要濟至言徇私
植黨請謁交通辭尤激切會舉行出入更迭之制公
在卿寺蓋二年矣首請補外除直敷文閣江西轉運
副使所部適草 詔趣行隨以璽書詢管下雨澤何
如公夙夜布宣 上德歲以不歉作暎兩樓於廳側
自為之記本道上供米九十餘萬斛歲費錢十餘萬
緡造運舟於贛吉其來已久使臣綱稍積習侵盜甚
則鑿舟沉之大率數年輒欠三十萬斛惟江表與國
建昌西四郡專募客舟未嘗損也公具以聞 詔官舟
客舟均用須歲終較其利害徐議更制文乃捐枋木
錢助諸州顧舟又蠲民間水脚錢十一萬緡即曹臺
置艘二百備其闕而贛吉船塲遂罷徙浙東提點刑
獄公事又徙閩路公已倦游力請奉祠得主管台州
崇道觀遂致仕積官至朝請郎公之自廣德歸也大

唐文苑英華卷之四十四
關園圃手自種植名曰日涉至是殆三十年木皆成
陰亭榭增葺公日從容其間歲時醜酒會賓客隣里
以為笑樂名士多賦詩美之淳熙三年八月十日以
微疾卒前三日猶秉筆作文臨終精神不亂其所養
如此享年七十有七先娶陳氏朝議大夫正原之女
繼室以其媚蓋忠肅公族也再娶曹氏武惠王之後
亦前卒皆贈恭人三子可宗登隆興元年進士第後
又中博學宏詞科終脩職郎南外敦宗院教授人皆
惜之可群迪功郎監潭州南嶽廟可舉將仕郎五女
長適朝奉郎知德安府周頡次適迪功郎監秀州支
監倉陳綱次適國進學士胡懷祖次適迪功郎廣德
運建平縣主簿葉巖次在室孫男五人符籥筌策節
孫女八人長適功郎監行在編佑打套局門黃聞餘
尚幼曾孫男女三人初公卜地於湖州武康縣慶安
鄉後汪村之原規畫兆域傍築息庵隨一相堂環以
松竹扁舟時至其上公既沒二子奉樞以葬蓋四年
三月二十日也公力學強記年十二下筆驚人入京師
太學每從儒先質疑義聞見日廣刻意古文恥作蹈
襲語下至尺牘亦可觀喜論天下事廷對述安危治
亂邊防形勢甚備兩上萬言書極陳利病當官務行

所學必欲事事辦治平居喜稱人善而覆匿其短貌
 壯氣和輕財重義勤於接物少老如一著述有易說
 二十卷論語解十卷蒙溪已矣集四十五卷後集二
 十卷河江雜著六卷會稽酬唱二卷芻胸集十卷芻
 蕘篇十卷南征錄二卷自警錄四卷編集 祖宗訓
 典五十卷編注杜少陵詩十八卷又年譜一卷昔予
 攝承詞掖公由會稽入朝袖詩數十篇為贄格律高
 妙予竊敬焉其後公于接按行廬陵遠訪予於郊野
 自是問訊無虛歲情好滋洽非得以葭莩之故也既
 序公出處又系之以銘曰

降才本天 成之者人 如彼良疇 勉其耕耘
 歲有饑穰 我無阨貧 敏乎魯公 能濟以勤
 既裕於政 亦唱其文 既食其實 亦章厥名
 有始有終 以歿其身 肇營新宮 山環水縈
 生樂斯丘 死反其真 我為銘詩 式敷雲仍

武昌簽判尚宗簿 大伸 墓誌銘 淳熙六年

公姓尚氏相州安陽人世以武勇聞右金吾衛大將
 軍贈本衙上將軍諱從諫者公之曾祖也生二子分
 習文武業其一掌麟府軍馬號名將其一以累舉入
 官贈太中大夫諱裴者公之祖也父諱佐均博學工

文章登進士第歷校書郎禮部郎官國子司業祭酒
終朝請大夫直龍圖閣後贈某官亦生二子長大倫
終迪功郎公其季也諱大伸字長道以父任為將仕
郎紹興五年補右迪功郎監西京中嶽廟版授臨江
軍新塗尉調吉州司戶參軍用新塗捕盜賞改承務郎
權知贛州安遠瑞金兩縣又權筠州之上高皆用治
辦聞以母夫人杜氏年高求監饒州景德鎮視事不
一月丁杜夫人憂時二十五年七月也服癸知贛州寧
都縣賜緋衣銀魚秩滿簽書威武軍節度判官廳公
事西外宗正簿又佐武昌軍淳熙五年閏夏大暑人
多病癰疽公亦瘍發于背庸醫妄投藥再旬不瘳公
志氣安定手書後事諄諄七月十六日坐而逝得年
六十有二惟母伯母實公之姊靖康兵亂公年尚幼依
伯父入蜀亂定來江南伯父謂我女兄早孤而賢命
歸公重兩家之好險阻艱難殆三十年共立尚氏之
門戶是生四男振祖振英振標振德女長適從事郎
田橡次適將仕郎羅尚賢次在實餘天公自為兒童
個儻有大志遇事智略常出人上少長氣貌環特議
論宥密偉未三十即治劇邑吏懷姦欺來前輒迎毀其
機牙咸噤不得發頑民屏息善良吐氣推心腹待僚

佐有不合面折之已乃懽然未嘗虞其怨也性不樂
 軟熟褶耳目每與上官辦曲直爭利害坐是抑厭不
 進益懷其負氣閉門讀書晝抄夕校忘寢廢食聞有
 奧篇隱帙百方求之以故博古多聞所至屈其坐人
 尤嗜資治通鑑編類四^五往往成誦有求問者應答如
 流平生喜劇飲當酣適時談諧貫古今志意薄霄漢
 聽者欣聳雅公詩下筆衮衮數百言其豪邁慕李太
 白精博學李義山而思致綿麗又效溫飛卿至^其
 得意處自謂不減古人今有家集十五卷和陶詩一
 卷存焉初公以宣和^{補官}五十年間輩行比至
 大官公纔為承議郎^{考公}課進朝奉階延賞于
 後乃不能待然公苦心教子家四壁立縮衣食之奉
 招致館客又躬督其課程夜以繼日振英已嘗舉于
 鄉矣詎知造物不使諸子益奮于學自致名宦寧失
 於此將得於彼耶公卿財重義周急不計有無雖甚
 珍愛之物人或稱美與之無^吝色身後僅餘圖書好
 玩數麓而已歲在丙戌女兄即世公即卜地於吉州
 廬陵縣某鄉之原寘雙穴焉一星終而公歿諸子乃
 以是年某月某日敬承治命奉樞合窆遠求來銘泣
 而銘之曰

佐有不合面折之已乃摧然未嘗虞其怨也性不樂
軟熟摺耳目每與上官辦曲直爭利害坐是抑厭不
進益懷其負氣閉門讀書晝抄夕校忘寢廢食聞有
奧篇隱帙百方求之以故博古多聞所至屈其坐人
尤嗜資治通鑑編類四五往往成誦有求問者應答如
流平生喜劇飲當酣適時談諧貫古今志意薄霄漢
聽者欣聳雅公詩下筆衮衮數百言其豪邁慕李太
白精博學李義山而思致綿麗又效溫飛卿至其
得意處自謂不減古人今有家集十五卷和陶詩一
卷存焉初公以宣和六年補官五十年間輩行比至
大官公纔為承議郎當上考公課進朝奉階延賞于
後乃不能待然公苦心教子家四壁立縮衣食之奉
招致館客又躬督其課程夜以繼日振英已嘗舉于
鄉矣詎知造物不使諸子益奮于學自致名宦寧失
於此將得於彼耶公鄉財重義周急不計有無雖甚
珍愛之物人或稱美與之無吝色身後僅餘圖書好
玩數簾而已歲在丙戌女兄即世公即卜地於吉州
廬陵縣某鄉之原寘雙穴焉一星終而公歿諸子乃
以是年某月某日敬承治命奉樞合窆遠求來銘泣
而銘之曰

太阿父相用乃缺弓驂騑父繼進乃蹶弓命實制
之非我拙弓生雖有涯名不可滅弓

恭州太守任君

續墓誌銘 淳熙六年

君諱續字似之潼川郫縣人系出漢廣阿懿侯教懿懿
後十六世為晉安東將軍顒顒九世為隋潯陽太守
璧謫椽閩中以死子孫因家焉璧生頴頴生業業生
雅相相唐高宗其曾孫晚疇皆達官大和中詔以二
龍旌其里晚生椿掌參梓州軍遂徙郫之興城椿生
韜符生崇誥崇誥生琦琦生仲簡生伯傳登景祐五
年乙科仕至尚書都官郎中是為君之曾祖都官生

度終普州司理司理生忠厚終朝請大夫知黎州君
之祖與父也文獻相承衣冠不絕蜀人論氏族者推
焉君少以父任為將仕郎父疾革戒君曰興城之任
世以儒科顯爾不可忘命易今名字君泣拜而志之
紹興七年起家為漢州維縣尉十三年又尉昌之永
川夙夜銜父訓懼從事不能卒業十九年求監潭州
南嶽廟二十一年遂中進士第選澧州州學教授晨
策羸馬從一僮謁守丞退則緝校遺編盡日與聖賢
對他無所問當路交薦二十八年自承直郎改左奉
議郎復求開州教授而去隆興元年就遷夔路轉運

司主管文字朝廷歲靡緡錢數百萬市馬川陝歷梁
洋下襄郢山行險遠道斃之餘至臨安者皆骨立有
大吏請治舟峽中乘漲水載馬東下既駛且安詔從
之無何官吏奉行弗虔効率者又加迫促資糧芻粟
篙師權夫一切取辦於民急若星火州縣大擾乾道
二年春君適還朝上疏言請調它道禁旅分屯夔峽
代民駕舟事已教闔如故異時荆楚出師北伐亦可
為上流聲援召對下其說君因論三事曰大臣雖罷
政猶當体國安得苟自便安宜使分守遑要漢郡剌
吏察舉二千石今監司專繩小吏夔監惡而直倍漕
數州州縣計口柳民瘡痍一道上嘉納之擢守
涪州未上易恭州四年春蜀大旱常平義倉素空竭
姦氓姚京始言官廩有餘誘致四方流冗冀以挺亂
君知其謀既按京抵罪即捐俸錢五十萬募民入粟
闔境爭勸趨之饘粥廬舍規畫有序至者如歸帖帖
無無事壁山有淫祠民病輒解牛以祭君下令禁止
訛言神云守奪吾祀民與牛皆將疫死郡人大恐君
知廟巫賈導之捕繫郡獄巫駭服巴縣令貪賈君劾
去之其子飛謗于朝言者因論君前議舟師為迎合
八月罷郡事六年夏主管台州崇道觀命至而君以

疾卒于左綿實九月戊子也淳熙丙申冬葬仙雲山之下得年五十有七積官左朝奉大夫君靜重廉介篤學喜為文身脩家齊勇於為義嘗傾產以調糝媚教養孤甥迄有成立仕官三十年先疇一無所增身後妻子假貸以歛君凡四娶二李氏鮮于氏皆增宜人今夫人王氏御史利用之女有賢稱子男七人義山興元府西縣尉義問義路義舉義端義明義正文三人一嫁文林郎馮適之一嫁進士鮮于糾宗一尚幼所著書號仙雲集者二十卷又有任氏春秋十五卷春秋五始五禮論五卷篆額石刻譜三十卷歲在戊寅冬十月君調益山教官過金陵予分教在焉以同年進士置酒道舊見君氣貌環偉議論慷慨意其將為世用孰謂君此止也此歲識其子義問於行在所博洽能文奧篇隱帙問無不知君可謂有後矣任氏其興乎義問將還蜀出石泉太守章森狀君之行實乞予為銘義不可辭銘曰

謂君窮時既逢謂君通志弗克德之洪報也豐劬爾躬後其隆兮

朝散大夫直祕閣陳公

從古

墓誌銘

淳熙十一年

自古有志功名之士常患其才無以高世才高矣未

必逢其時時逢矣不必皆為主知幸而見知則摩九
霄撫四海非難也然而將起輒仆未耄遽沒茲非命
歟嗟吾希顏不幸乃如此交友聞而悲之况予先大
父與希顏之大父為同年進士予又綴名希顏榜中
在斯集所日日相從間雖出處不齊而契愛厚矣晚
豫政中書每廳玉音論當世人物必才希顏顧不能
悉力薦引使以所長大顯於世則夫悼惜愧惜豈止
同乎衆人而已今其仲子縑縑來告曰先君葬有凶
不肖孤捨几筵而銘是求成而志也將紓予悲不在
茲乎乃序而銘之希顏姓陳氏諱從古系出漢文範

先生文範生謹謹生忠忠生佐佐生伯珍晉建興中
渡江居曲阿新豐湖即今鎮江府金壇縣境也故君
為壇金人曾祖廓熙寧九年進士仕至朝奉文夫利
州路提點刑獄事祖成登第在元符三年終文林郎
知真州楊子縣父為屢貢禮部竟以特恩入官主信
之弋陽簿後贈朝請大夫君天資雋敏兒童時應對
賓客有成人風稍長自力于學為文辨麗闔壯儒先
交譽之紹興二十一年中進士第七陽府君喜曰世
業有傳足澡吾耻調臨安之富陽尉秩滿用賞改左
宣教郎為郡州州學教授殿中侍御史張振議板君

入臺會廷遷中書舍人而止入監左藏東庫未上丁七
陽憂免喪監行在權貨務都茶場丞相虞雍公問君
歲終出納幾何君曰國家利源齟茗若半自合同關
子行遂虧常額丞相命君即都堂條掾弊之策於是
關子罷而歲入增矣都城浚運河丁夫輦泥積務門
君爭曰隙地以遠火災室之可乎尹恃勢弗聽君朝
衣坐泥中上聞之夜半為降旨禁戢已而車駕閱武
近郊君進詩五十韻姓名益簡 上心命措置浙西
監事以勞擢司農寺主簿坐法免旋起知蘄州赴闕
奏事 上曰卿書生能通世務昨宣力務場為多獎
勞久之到郡暮月 上以湖南歲比不登選君提點
刑獄始至衡陽民有被誣以淫祀殺人者更三赦不
決君奏釋之詔下而雨教官作平反堂記紀其事時
乾道七年也十二月就除本路轉運判官以明年二
月視事專任荒政蠲逋欠以萬計 御札令同師臣
收養貧民所棄嬰兒君悉心奉行楚人德之夏秋復
閔雨君精禱獄鎮遂大有年武岡狂人憑恃谿谷創立
樓櫓議者欲以兵問罪君曰往連不稔彼迫饑餓為
保聚計耳今可文告定也遣吏鐫誥酋長帖帖聽命
其後長沙水溢穿城郭敗廬舍君督吏卒䟽理池隍

計戶給土木費人忘其災事聞復下璽書問狀併論賑濟功特除直祕閣是冬京西謀帥上閱諸道監司姓名指君曰陳謀有才無以易之九年正月開府子襄即奏言朝廷以襄為上游重地增俾益戍緩急許調鄂師善矣但節制不一莫知適從紹興隆興間嘗萃荆鄂兩軍於此分地以守東盡隨與棗陽鄂帥趙樽主之西盡均州光化軍荆帥王宣主之權均力敵各行其說樽欲持重宣欲轉戰此不立統帥莫相臨制之失也今若全為一軍擇宿將為都統制屯武昌置副帥屯襄陽或一年許其更戍則號令歸一無敢首尾誤國矣疏入上適有此意四月乃用吳玠為荆鄂駐劄諸將都統制而以王世雄副之分治荆南其後荆南軍竟更戍襄陽至今以為便北界有叛者來虜以兵壓境或請增戍受降君固執不可揭榜上示無招接意虜兵遂退上謂丞相曰從古倉猝應變足銷疑沮之謀可論此意以獎之淳熙改元復坐論列而罷二年春主管台州崇道觀自是閑廢者九歲上眷之不衰鑄錢使者嘗闕召君欲用之繼即其家連畀衢饒秀三州印綬皆不果行君自知數奇願復食祠祿朝廷為脩廢官差主管南京鴻慶宮卜

築洮湖上奉親教子之餘猶孜孜時有所見聞輒論
 著告于有位鄉邦游饑周恤甚勤居閑好客酒後談
 論激烈聽者忘倦自高曾以來世工篇什君及從呂
 君仁向伯恭蘇養直游往往得其句法尤受陳便去
 非詩取簡齋集盡次其韻東衰古今詠梅自鮑參軍而
 下迄近世名公得古律千餘篇次第屬和豐豐腴清婉
 兼備衆體體無枝辭複語 駕幸祕閣君自以寓真其
 間奏百韻詩以賀詔與宰執侍從等所進同付史館
 措紳以為寵九年秋以事如城中八月二十日還至半
 塗遇疾而逝於是母夫人譚氏年八十六矣君孝而
 不得終養是尤可悲也積官朝散大夫得年六十有
 一娶薛氏承議郎諸王宮大小學教授璿之女嫁時
 年二十四逮事尊章孝謹知書宗族稱賢再封安人
 前君九年卒追贈宜人五男子伯震從事郎監江陵
 府糧料院仲巽當以致仕恩補將仕郎叔謙季益季
 咸未仕女適從事郎興國軍判官趙師沔孫男女四
 人伯震等卜以十年十一月二十九日葬君本縣唐
 安鄉茂城之原舉薛宜人樞柩祔焉其地介于祖考三
 瑩間銘曰

孝友以為質詩書以為輔科名世其家才術知乎

主天於希顏可謂厚其賦與矣既黻黼之又黼黻
之竟何取哉竟何補哉

省齋文稿卷第三十四

